

Reykjavík, 29. maí 2017

Mennta- og menningarmálaráðherra  
Kristján Þór Júlíusson

**EFNI: Ósk um að menntamálaráðuneytið leiðrétti nýlega reglugerð um fyrirlögn og framkvæmd rafrænna könnunarprófa þannig að réttur foreldra og nemenda til að skoða metin verkefni verði virtur, í samræmi við 27. grein grunnskólalaga.**

SAMFOK, samtök foreldra grunnskólabarna í Reykjavík, telur að nýlegar breytingar á reglugerð um fyrirlögn og framkvæmd samræmdra prófa standist ekki grunnskólalög. Í 27. grein laga um grunnskóla er skýrt kveðið á um að nemendur og foreldrar þeirra eigi rétt á upplýsingum um niðurstöður mats, matsaðferðir og matstæki, þar með talið að skoða metin verkefni og prófaúrlausnir.

Í nýlegri reglugerð um rafræn samræmd könnunarpróf kemur hins vegar fram að úrlausnir úr prófum verði gerðar aðgengilegar, en að Menntamálastofnun sé ekki skylt að birta prófin hverju sinni, enda séu þau endurnýtt við að þróa prófabanka fyrir einstaklingsmiðuð samræmd próf. Þetta þýðir að foreldrar og nemendur eiga að geta skoðað svörin, en ekki sjálfar spurningarnar, og dregið af því vitrænar ályktanir hvernig svör þeirra hafa verið metin. Þetta stenst hvorki grunnskólalög né heilbrigða skynsemi. Við teljum enga lagastoð fyrir því að Menntamálastofnun geri einungis úrlausnir úr prófum aðgengilegar, en ekki prófin sjálf. Það eru sjálfsgöð réttindi nemenda, óháð aldri, að skoða metin verkefni og próf. Við teljum slæmt að réttur nemenda og foreldra þeirra hafi með þessum hætti verið látinn víkja fyrir hagsmunum stofnunar vegna þróunar prófabanka.

SAMFOK óskar eftir atbeina ráðherra, að reglugerðin verði lagfærð og að lögbundin réttur foreldra og nemenda til að skoða metin verkefni verði virtur. Við teljum brýnt að erindi okkar verði afgreitt án tafar, þar sem sumarfrí eru framundan og umrædd reglugerð tekur m.a. til samræmdra könnunarprófa í íslensku og stærðfræði sem haldin eru að hausti í 4. og 7. bekk.

Með góðri kveðju,  
Birgitta Bára Hassenstein  
formaður SAMFOK

Meðfylgjandi eru tilvitnanir m.a. í helstu lög og reglugerðir

**Afrit sent til:**

Umboðsmanns Alþingis  
Formanns félags skólastjórnenda í Reykjavík  
Formanns félags kennarafélags Reykjavíkur  
Formanns skóla- og frístundaráðs Reykjavíkurborgar

### **27 grein, lög um grunnskóla, frá 2008:**

“Nemendur og foreldrar þeirra eiga rétt á upplýsingum um niðurstöður mats, matsaðferðir og matstæki, þar með talið að skoða metin verkefni og prófúrlausnir. Þeir eiga jafnframt rétt á munnlegum skýringum á námsmati og að niðurstaða námsmats sæti endurskoðun innan grunnskólans.”

<http://www.althingi.is/lagas/nuna/2008091.html>

### **Mars 2017, úr 10 grein nýrrar reglugerðar um fyrirlögn og framkvæmd samræmdra könnunarprófa:**

“Menntamálastofnun skal birta opinberlega dæmi um prófatriði úr öllum námsgreinum og námsþáttum ásamt lýsingu á þeirri hæfni sem metin er. Þá skal Menntamálastofnun gera prófúrlausnir aðgengilegar fyrir skóla svo hægt sé að skoða svör nemenda. Skólinn afhendir foreldrum prófúrlausnir ef eftir því er óskað. Menntamálastofnun er ekki skylt að birta prófatriði samræmdra könnunarprófa hverju sinni enda séu þau endurnýtt við að þróa prófabanka fyrir einstaklingsmiðuð samræmd könnunarpróf.”

<http://www.reglugerd.is/reglugerdir/eftir-raduneytum/mennta--og-meningarmalaraduneyti/nr/20450>

### **Okt. 2009, úr 4. grein reglugerðar um miðlun og meðferð upplýsinga um nemendur í grunnskólum og rétt foreldra til aðgangs að upplýsingum um börn sín:**

“Nemandi og foreldri eiga rétt á að skoða metnar prófúrlausnir nemanda. Jafnframt hafa nemandi og foreldri rétt til að skoða og fá aðgang að þeim gögnum sem liggja til grundvallar hvers konar vitnisburði um námsstöðu nemandans.”

<http://www.reglugerd.is/reglugerdir/eftir-raduneytum/mennta--og-meningarmalaraduneyti/nr/15939>

### **6. mars 2017, frétt af heimasíðu mennta- og menningarmálaráðuneytis varðandi nýja reglugerð um fyrirlögn og framkvæmd samræmdra könnunarprófa:**

“Menntamálastofnun er ekki skylt að birta prófatriði samræmdra könnunarprófa hverju sinni enda gert ráð fyrir að hægt sé að endurnýta þau við að þróa prófabanka fyrir einstaklingsmiðuð samræmd könnunarpróf. Í stað birtingar prófatriða skal Menntamálastofnun birta opinberlega dæmi um prófatriði úr öllum námsgreinum og námsþáttum ásamt lýsingu á þeirri hæfni sem metin er.” <https://www.menntamalaraduneyti.is/frettir/forsidugreinar/ny-reglugerd-um-fyrirkomulag-og-framkvaemd-samraemdra-konnunarprofa-i-grunnskolum>

### **2. maí 2017, Morgunblaðið, forstjóri Menntamálastofnunar:**

“Við birtum ekki sjálfar prófaspurningarnar heldur sambærilegar spurningar. Ástæðan er sú að við erum að þróa prófin þannig að þau verði betri og áreiðanlegri. Þannig getum við notað prófaspurningarnar til lengri tíma og það gerir okkur kleift að skoða breytingar yfir tíma.”